

福建列傳卷十五

宋十二

梁應庚字本仁號止堂閩縣人寶慶二年擢進士第調南安主簿以母老不赴母卒應庚曰母亡矣吾何仕爲汀守李華高其行辟爲武平主簿敦勸之出武平瘴鄉盜窟應庚威華知己勉爲一出俄攝令清介自守四勦強寇民呼爲慈父繼守張紳以勞績上得旨與堂除差遣丁酉堂差江西節制司準遣端平三年郊祀夕雷雨應庚上疏論時事皆人所不敢道者改辟兵鈴司峒寇作應庚多所宣力自是胡泓胡適程元鳳劉克莊徐經洪天賜應薦不起終詔除直祕閣卒

竹溪鬳齋十一藁

趙汝騰字茂實古田人簡王元份八世孫寶慶二年正奏歷差主管禮兵二部架閣遷籍田令召試館職授祕書省正字升校書郎尋升祕書郎兼史館校勘輪對言節用先自乘輿宮掖始兼玉牒所檢討官以直煥章閣知温州進直徽猷閣江東提點刑獄又進直寶文閣差知婺州召赴闕累福建列傳宋十二

一

福建通志
總卷三四

遷禮部侍郎前後所止三十餘疏指斥時弊無所避忌權工部尚書初右丞相鄭清之雅敬汝騰嘗欲除汝騰直院汝騰不受會日食汝騰疏清之賄政狀清之怒諷左司諫陳垓論汝騰罷去尋召爲禮部尚書兼給事中入奏言前後姦諛之臣傷善害賢自取穹要之職何益於陛下而深損聖德興利之臣移東就西自遂谿壑之欲何益於陛下而深戕國脈則陛下私惠羣小之心可以息矣先是左司徐霖爲汝騰所薦霖論諫議大夫葉大有并斥蔡杭王必詔霖與在外差遣理宗慮汝騰繳駁先徙汝騰翰林學士知制誥兼侍讀禮部郎中高斯得上言汝騰在瑣闥僅兩月凡所繳駁皆國家大事一旦墜以虛名奪其要職是則名遷而實逐之也時汝騰未供職大有遂劾汝騰與霖同謀汝騰聞之固辭上章乞歸卽日出關歸故里著作佐郎牟子才奏陛下用汝騰爲給事中小人重足而立側目而視久矣汝騰固知其勢之甚難而力之不可勝陛下弗肯爲之主則汝騰自不可一日留望陛下察其心亮其忠留令供職以沮小人已而累召力

辭復以龍圖閣學士知紹興府浙東安撫使召至闕以端明殿學士提舉
佑神觀兼翰林學士承旨知泉州兼知南外宗正事未幾以資政殿學士
致仕卒諡忠清汝騰好賢下士汲引如不及李伯玉何基湯漢其尤著也
朝廷嘗賜田宅以旌其廉世號庸齋先生

宋史八閩通志道光舊志

黃師雍字子敬閩清人少從黃幹學登寶慶二年進士第爲楚州屬官值
李全反狀已露師雍密結忠義軍別部都統時青圖之謀泄全殺青師雍
不爲動朝議褒異調婺州教授學政一以呂祖謙爲法李宗勉趙必願趙
汝談皆薦之募徐僑有清望欲往謁會僑有召命師雍曰今不可往也僑
聞而賢之宗勉在政府力言於丞相喬行簡行簡已許以朝除師雍見行
簡勸其歸老行簡不悅宗勉之請遂格出知龍谿轉運使王伯大上其治
最行簡罷宗勉與史嵩之入相召師雍審察將至而宗勉卒嵩之延師雍
密示相親意師雍不答遷糧料院又曰料院與相府密邇所以相處師雍
亦不答嵩之獨相權勢浸盛未有發其奸者博士劉應起首疏論嵩之理

福建列傳宋十二

二

福建通志
總卷三四

宗感悟思逐嵩之師雍與應起相善故嵩之疑師雍左右之諷御史梅杞
擊師雍差知興化軍旋改邵武軍及應起爲監察御史師雍遷宗正寺簿
拜監察御史首疏劾金淵秩送外居住再疏斥趙綸項容孫史育之嵩之
父喪起服右正言李昂英殿中侍御史章瑛共疏乞竄斥師雍亦上疏論
列理宗感悟卽日詔勒令致仕權直舍人院劉克莊封還詞頭乞界嵩之
以帖職如宰臣去國故事遂得守金紫光祿大夫觀文殿學士致仕議者
曰大夫官也觀文職也元降御筆但云守官觀文之命自克莊敗之師雍
遂劾克莊朋邪免所居官琰亦繼劾克莊師雍又乞籍嵩之家隸張叔儀
皆從之時臺中鄭家趙與鷺周坦陳垓葉大有合爲一師雍獨立案等圖
所以去之會大旱求言應詔者率謂災由案等盧鉞語尤峻案等僞撰匿
名書師雍發其僞迹適鉞疏啓師雍案指爲阿附理宗不聽擢師雍左司
諫未幾案入政府謝方叔趙汝騰疏其姦罷之師雍與丞相鄭清之故同
舍然劾劉用行魏峴皆清之親坦喜曰吾得所以去之矣遣其婦造清之

妻譖曰彼去用行峴乃去丞相之漸也理宗將以師雍爲侍御史清之曰如此則臣不可留遷起居舍人兼侍講卽力勾去清之猶冀師雍少貶師雍曰吾欲爲全人終不屈數月坦卒劾師雍及高斯得俱罷清之卒起師雍爲左史旣而改江西轉運使遷禮部侍郎命下而卒

宋史南宋書

盧鉞字偉節永福人淳祐四年進士調建昌軍學教授宰相史嵩之遭父喪起復鉞上書論之不報已而國子祭酒徐元杰薦鉞奮身庠序卓然以名節自持忠誠懇惻奮不顧身乞加錄用召補京秩七年大旱求言應詔者多指鄭宋周坦等爲起災之由鉞與牟子才李伯玉語尤峻坦撰匿名書誣鉞等黃師雍爲之辨於楊前適鉞疏有譽師雍語宋遂劾鉞附師雍理宗猶不之聽也尋爲臺評所論而罷咸淳間累擢至戶部尚書以終孫翼鳳字昭端長溪人父文祥字元吉開禧間自浦城解館歸至霍童暮投宿夜半聞內寢哭聲問故有夫婦曰吾兒不肖已賣此屋明當遷去旦起則荒冢心異之少選一人挾鍾存至問其故曰家貧鬻祖墳於人將徙

福建列傳宋十二

三

福建通志
總卷三四

矣文祥曰貧我賑汝慎無徙墳頃囊與之尋夢寄宿主人奉二鳳入拜曰厚恩莫酬二雛爲謝遂孕二子名其長曰附鳳次曰翼鳳翼鳳以鄉舉入太學時史嵩之以父憂謀起復翼鳳率同舍生黃伯愷金九萬等同攻之又斥和議事言甚剴切紹定壬辰與附鳳同登進士累官御史大夫簽書樞密院事立朝數十年勇於擔荷任事多所諫諍贈太師中奉大夫附鳳亦官簽書樞密院第附鳳似道以進士論少之

以上閩書道光舊志

案據閩書附鳳翼鳳係紹定五年進士然翼鳳攻史嵩之起復在淳祐四年必無先登進士後入太學之理考舊志選舉附鳳乃淳祐十年則翼鳳旣與同登必亦是年

洪天錫字君疇晉江人寶慶二年進士授廣州司法歷知古田縣有倚王勢殺人者誅之通判建寧府寶祐三年正月擢監察御史天錫上封事言古今爲天下患者三宦官也外戚也小人也謹案內侍省東頭供奉官董宋臣宦寺之貪黷者也託名造寺豪奪民田密召倡優入褻清禁樓攬番

商大開賄賂不斥宋臣必爲聖德之累將作監謝堂外戚之貪黷者也狼
復喜於陵物攫拏旁若無人不曰以備中殿宣索則曰當取教旨豁除不
去堂必爲宮闈之累集英殿修撰知慶元府厲文翁小人之無忌憚者也
神皋流毒屢玷評彈藉衣錦威行攫金術今又移其剝越者剝鄞矣然民
敢怨而不敢言以其依憑邸第耳不去文翁必爲王府之累疏上兩日不
報天錫徑出江干待罪理宗令堂自陳乞祠除職予郡文翁別與差遣宋
臣罷內轄俟首尾了日解職天錫言自古姦人雖憑怙其心未嘗不畏人
主之知苟知之而止於戒飭則憑怙愈張反不若未知之爲愈也立夏日
天雨上天錫以其異爲蒙力陳君子小人之所以分乞屏絕私邪休息士
木以弭天災會吳民仲大論等列懇宋臣奪其田天錫下其事有司而御
前提舉所移文謂田屬御莊不當白臺儀鸞司亦牒常平天錫謂御史所
以雪冤常平所以均役若中貴人得以控之則內外臺司廢猶爲國有紀
綱乎復言上下窮空遠近怨疾獨貴戚巨闔享富貴耳使天下窮且怨誰
福建列傳宋十二

四

福建通志
總卷三四

下能獨與數十人者共天下乎又言內司供繕修而已比年勅曰御前姦
賊之老吏逃遁之凶渠一鼠名其閒則有司不得舉手狡者獻謀暴者助
虐其展轉受害者皆良民也願毋使史臣書之曰內司之橫自今始上疏
至六七遂辭位出關凡爲御史六月而去是時宋臣等肆橫外閭朝紳多
出門下莫敢言者天錫新進孤立獨彈劾無所顧忌羣小側目理宗知天
錫廉介議不行景定元年起知潭州節制屯戍軍馬踰年大治度宗卽位
以侍御史兼侍讀召累辭不允乃疏所欲對病民五事曰公田曰關子曰
銀綱曰鹽鈔曰賦役又言在廷無嚴憚之士何以寢姦謀遇事無敢諍之
臣何以臨大節咸淳二年遷福建安撫使亭戶買鹽至破家損身者皆罷
之又罷荔支貢八年加端明殿學士致仕卒諡文毅天錫居家清介臨事
是非不可回折其劾宋臣等諸疏事雖不果行然終宋之世宦寺不能竊
弄主威者天錫之力也所著有味言發墨

天驥字逸仲天錫族弟號東巖與天錫齊名稱二洪淳祐七年進士初調

建寧縣尉有劫寇王若曾嘯聚千餘人天驥奮不顧身提兵捕其巢一舉空之寶祐改元被命校文貢闈得文天祥卷置之上第餘所取多知名士參政徐清叟尙書顏頤仲殿中侍御史吳燧交章薦天驥才學有沮之者遂丐歸景定二年知廣州香山縣俗素諱健戢其尤桀黠者曰此囚牙訟師去則吾民安矣咸淳四年用薦改監都進院尋出知潮州潮與漳汀接壤鹽寇羣聚剽劫俱以州兵單弱山徑多蹊不能討天驥設法討捕寇皆屏息復於接境置屯多者三百人少者二百人犄角爲援具條畫上於朝并下漳汀二州依法施行郭外有護田舊堤多鬻於水天驥捐俸脩築民號爲洪公堤在潮五載以病丐祠主管華州雲臺觀十年卒

宋史文山全集道光舊志

翁甫字景山崇安人父易博通諸經尤長春秋嘗從劉燾遊得登朱熹門悉得旨歸學者稱竹林先生甫登寶慶二年進士薦和衢州西安縣治最聞召監登聞檢院陞對稱旨除資善堂直講舊提點中官對拜之禮甫抗論其非理宗嘉納尋兼太常博士參政別之傑

案圖書作劉之傑誤

孔明禮禮儀使

福建列傳

宋十二

五

福建通志總卷三四

跛倚失儀甫論罷之遷祕書丞兼禮部郎以陳垓論罷出知汀州丐歸後以將作少監召俄改兩浙轉運判官遷太府少卿兼知臨安府奏免節序供奉內殿儀物又嘗言皇嗣入宮而左右有以果實器玩獻者乞加禁絕不報出爲江西轉運使踰年兼知隆興府改知泉州未赴一日聞有太學生言事被謫者憂憤流涕觸動痼疾卒所著有蜀漢書浩堂類稿英雄錄外制集奏稿讀書壁記西安南昌判筆

閩書建寧人物傳東越文苑

陳顯伯字汝仁號竹所羅源人寶慶間釋褐任中書舍人權直學士院歷吏部尙書兼端明殿大學士通奉大夫爵長樂郡開國侯食邑一千二百戶初職講官度宗稱善誘後去位理宗思以儲貳託顯伯以寶章閣直學士除授顯伯爲相時多忌刻以足疾堅辭不起乃詔加端明殿大學士致仕

羅源縣志

吳燧字茂新同安人父檜慶元五年進士終鬱林州簽判燧紹定己丑擢乙科授從事郎歷惠州推官陳三槍犯湖廣陳譚方督三路饋餉燧躬部

送往返廣卒叛郡寮或遁去燧獨佐歸善令趙希鉉捍禦秩滿差教授福州專以課試定去留儲學廩之贏葺廟學刊通鑑綱目等知攸縣修豐積倉補亡粟繕邑庠柳寇震鄰總扼要害境內肅然陳韓爲安撫大使辟主管機宜文字事必咨焉淳祐十年至行在謁左丞相鄭清之恨見之晚衡文南省揭曉除書庫官遷太學博士踰月除監察御史兼崇政殿說書奏疏以正紀綱通言路爲第一義抨彈所及多貴要親昵冬至雷變燧與同臺御史潘凱交章論清之初相端平人以小元祐目之比及再相內降頻出不聞如杜衍之封還大計未定不聞如韓琦之力請以陳力不能之時昧知足不辱之戒丙申之雷引咎策免今茲之雷不聞辭位是君臣皆以天變爲不足畏矣臣謂其咎過於張禹臣願自比於朱雲宜俾奉冊就第而登庸有德望宦官宮妾不知名者代之理宗方以師傅禮貌厚清之疏入報聞而已燧求罷詔以大理少卿留之不拜而去董槐封還詞頭亦去都人士祖餞四學作爲誦詩直聲滿天下矣踰年除直秘閣廣東提刑至福建列傳 宋十二

六

福建通志
總卷三四

則慨然曰是邦乃張曲江故里周濂溪楊誠齋舊治也闢湘江書院重建講堂匾曰道立文風一變十二年召除秘書少監兼國史院編修官實錄院檢討官入對言今和羅擾民征權困民鈔籍奪民科敷病民怨氣極矣淮蜀連歲被兵尤可哀痛願絕內降裁私恩聚忠賢抑嬖佞節不急之費去不良之牧理宗嘉納之擢殿中侍御史兼侍講時盛夏猶寒燧奏宜崇陽抑陰有云塞侍門使宮闈之陰不得干外朝之陽屏邪佞使小人之陰不得勝君子之陽固封守使夷狄之陰不得犯中國之陽又言蜀危乞命重臣建閫及治余玠賓客程逢及朱申李卓等之罪又言玠子如孫柎載蜀寶貨東下宜下於理沒入所竊以餉軍又言余晦敗事遁歸宜奪從臣恩數語皆剴切西太乙宮新建駕將迎謁燧陳三不可畧曰名爲拜謝迹類游觀况馳道越在關外支犒重費國力理宗悚然中輟嘗薦洪天錫爲御史首論戚官董宋臣等三人之罪理宗使燧諭天錫易疏天錫抗論愈峻燧奏乞行天錫之言又奏臣不能順旨甘受誅殛天錫改太常少卿不

拜燧改禮部侍郎亦不能安於位相踵而去開慶改元除集英殿修撰提舉江州太平興國宮未幾奪職罷祠景定五年召赴行在未至而理宗崩度宗即位除兵部侍郎乞致仕卒贈通議大夫燧於善類極拳拳嘗薦三十人多知名士晚年卜築城中爲三堂一齋曰桂堂以合族也曰師貽以奉先也曰學林以藏書也齋曰警齋皆宸翰也暇日與里社諸公觴咏其間撫愛弟龍溪主簿端如子人多稱之

後村大全集泉州府志

蔡杭字仲節號久軒建陽人沈次子紹定二年進士淳祐五年召試館職除秘書省正字六年遷校書郎兼樞密院編修官復兼諸王宮大小學教授輪對極論官闈省禁邊閫州縣諸弊事復奏國儲未建無以繫屬人心理宗曰祖宗朝亦是晚年方定杭對祖宗建立名號雖在晚年而定計乃在一二十年之前此事最忌因循理宗深然之尋遷著作佐郎兼右侍郎官疏劾參政劉之傑素附史嵩之不協物議及陳邇日風俗頹廢無恥等事出爲江東提點刑獄移浙東召爲國子司業會三學諸生伏闕訟臨安福建列傳宋十二

七

福建通志總卷三四

尹余晦狀杭亦力言之晦罷職而杭除宗正少卿出知隆興府寶祐元年除太常少卿權工部侍郎上言治生於敬亂生於肆惟敬則知一人之勢不足恃惟肆則謂天下之言不足恤此安危治亂所從始也臣採之近事其目有五民心之弗顧也仁賢之弗信也直言之弗受也戚里之用多也近習之勢盛也夫民者國家之根本也去夏之水九郡之民同時魚鼈而廣福太乙棟宇翬飛去冬之火都市腹心悉爲煨燼而龍翔除道大增形勢聖意豈不曰官寺之造悉出內帑初無毫髮之取於民室堵之侈優給其直初無纖芥之拂於衆不知邦計民財元同一體此耗彼涸烏可異觀賢者國之命脈也其閒固有立論之過乎峻而大體則皆本乎正固有制行之過乎剛而存心則皆根於忠邇來一鳴去國年歲將周召環未聞梗棄仍昔執而弗改國勢誰張言者國之元氣也曩者奎文炳煥過軫宸憂欲直慙之不流於訐於是有譁競紛紜之規欲論事之不流於浮於是有廉訪不真之戒破觚求合浸浸成風導獎一偏其流必盛自古進用戚里

未有不危國今清華要津貴介雜沓名藩濡轡姻婭聯翩人言紛紛天聽藐藐執而弗變民社日垂自古近習太親未有不危國者今左右嬖倖氣燄熏灼蓋其甘佞之進易以蠱上之精神浸潤之行易以變事之黑白始而廣見聞以結主知終則紊是非而移君柄此而弗懲勢將難窒陛下但見目前順指班列風恬其莫違也似可樂其無譁也似可愛不知求得欲從之際皆咈理傷道之基上令下承之間乃禍機危括之自可不深長思哉疏入理宗嘉納累擢同知樞密院事尋除參知政事已而詔除侍御史丁大全爲簽書樞密院杭奏大全權姦不可用未報杭卽日出國門有旨勉留不返詔受職予祠尋爲中書舍人林存所駁寢其命明年同知樞密院張礪言杭精通經術忠直敢言宜復祠祿以勵清節詔復端平殿學士提舉洞霄宮任便居住杭謝表猶云願陛下仰鑒前世權臣之敗亂俯察大全奸詭之當憂則國家集和平之福宗社有磐石之安開慶元年卒年六十有七諡文肅

宋史道光舊志

福建列傳 宋十二

八

福建通志
總卷三四

馮庭堅字舜舉建陽人性倜儻讀書必求有用屢試禮部不第退益洞究孫吳兵法紹定二年閩中盜起汀有黃緣頭邵有劉安國鋒銳甚郡守聞庭堅名募爲隅總籍保伍以衛鄉里或言非文士所任宜辭之庭堅曰庠序所教養者謂何顧乃臨難苟避坐視桑梓塗炭耶於是捐家資給鄉丁日習戰事別招義勇二百人防守險要賊由光澤趨麻沙將犯郡境庭堅親往唐石募一千人爲土軍號忠勇寇破邵武乘勢入境庭堅率忠勇進丁字橋設三伏以禦之賊衆大潰旣而賊增衆復來合數千人庭堅令諸軍皆伏山下而卓白旗於對山之頂賊不敢進而退庭堅選壯士二十人夜入賊營使聞金聲則合而擊之金止卽息凡數合而還無一傷者因令鳴金如前賊每聞金聲卽起自相屠戮終夕擾亂比辨色望之已悉遁去自是不復東向尋賊再入光澤庭堅分兵爲援而已軍下橋以待之少頃賊擁衆來庭堅張左右翼應之皆殊死鬪庭堅親自出陣發矢射斃賊驍勇者數人遂躍馬衝其陣衆悉力併擊賊大敗望忠勇旌旗而走端平元

年唐石冀日未作亂郡守袁甫調遣左翼軍等討捕而以教授包恢監軍仍差庭堅爲軍前計議唐石山高深險固而牛頭嶺正唐石之阨隘俯闕層崖前阻清流路止可容側足庭堅由閒道達竹溪二十四保約其首領助官軍以斷唐石左臂賊衆數千分道而至庭堅領兵涉溪南岸率先邀擊別遣士兵沿溪繞出北岸夾擊之擒日未妻孥皆斬之金人寇淮東高郵守朱復之辟庭堅權在城兵馬監押已而敵犯相城庭堅部馬軍清野道遇敵騎庭堅語所親曰有難我當死國汝徐收我骸骨以歸平日整隊徐行敵人以爲疑兵不敢逼謀報金兵至菱塘守召庭堅謀之庭堅曰欲得四輕舟弓弩二百守如所請庭堅駕舟抵岸伏兵田舍後敵先鋒數十騎直衝前來臨流不能制突入泥淖中伏兵射斃數十人盡奪其馬敵應兵至庭堅從容登舟敵人相顧駭愕自後不敢窺高郵守申奏以爲菱塘第一功也賞典未行而卒

道光舊志

鄭采字載伯長溪人紹定二年登進士甲科授隆興府推官侍御史注剛福建列傳采十二

九

福建通志
總卷三四

中者郡人也有富僧死剛中利其貲欲奪之先貽書怵府察案憤然曰腕可斷筆不可曲剛中謀乃沮淳祐元年召試館職除秘書省正字宰相史嵩之使客通殷勤采不答輪對言天下之壞極矣私意黷弄非一人禍胎醞釀非一日不獨當國者之罪亦聖心未能無欲而然也理宗稱善久之除校書郎再對極言至日雷變之異以爲陛下修身之道未立朝廷布公之實未著三邊形勢渙散沿江守戍單弱臣恐三百年金甌之業壞於今日矣轉著作郎俄除右正言兼侍講時嵩之以父喪去位理宗用嵩之意未已采奏乞早改命他相絕其覬覦理宗以邊事爲辭采奏曰嵩之以小勤曲謹惑陛下之聰明以淺效微利蠱陛下之心術昔王曾慮丁謂復用逮其死而後有喜色曾之存心天下之公心也豈爲一身計哉不然秦檜再相蔽欺日深一時流落僅存之士大夫幾不免盡殲於其手豈不可監哉采爭論移晷方退復疏當世名流宜召用者以進且言宰相非百官比不宜久虛御筆批答曰卿所奏雖切事理進退人才豈易事也采遂自劾

歸家待罪有旨宣諭宰執趣赴闕除殿中侍御史案復以次論劾濮斗南
項容孫陳一薦王瓚等十餘人皆嵩之黨也詔銷秘罷祠有差中外肅然
嵩之從子璟卿死都人籍籍言嵩之僕實毒之案奏璟卿嘗訐嵩之嵩之
果殺之以滅口乞窮治璟卿死狀未幾國子祭酒徐元杰暴卒元杰亦嘗
攻嵩之者案率臺諫請昭白其事以紓朝野之憤詔委案鞠實案反覆審
究言元杰毒死明甚然踪跡詭密不得主名乞下有司重賞求賊不敢以
一勘不獲而遂已朝廷以獄無實跡命就十數輩斷遣而已校書郎徐霖
上書力詆案不能明此獄之冤不報遂引去霖本案所薦士案聞之奏曰
奈何以臣故失賢士疏乞留霖亦不報會詔求直言而應詔者多指案初
試館職嵩之與有力焉元杰之冤不伸由案德嵩之而然案言盜殺唐相
武元衡投紙金吾府縣曰毋急我我先殺汝或告王承宗遣卒張晏所爲
既伏辜矣後東都留守呂元膺獲真盜則殺元衡者李師道也夫遺紙有
迹矣有告之者不爲無證矣猶不免於逸盜而殺無辜況無迹與證欲於

福建列傳

宋十二

十

福建通志
總卷三四

旬日之內就十餘囚煅煉成獄非臣所能臣前乞昭白公言也今乞求賊
亦公言也議者謂臣黨惡臣之心迹可不待辨惟是不能訖獄實臣之罪
章再上理宗曰卿所論皆嵩之黨且每言其短妄議不足恤也遷侍御史
疏言比年以來舊章寢廢外而諸閭不問動勞之有無而爵秩皆得以例
遷內而侍從不問才業之優劣而職位皆可以例進執政之歸休田里者
與之貼職可也而凡補外者皆授之矣名器之輕莫此爲甚無功者受賞
則何以旌有功之士有罪者假寵則何以服無罪之人語皆切中時事擢
左諫議大夫兼侍讀時理宗政多寬縱挾私干請者紛紛案言若專以苟
且姑息爲務則惠竭而人輕其上矣淳祐七年七月除端明殿學士同僉
書樞密院事初案嘗佐陳韓幕府案登臺省後韓乃被召及韓論三學事
偶與案同衆大譁謂案本由韓進韓不忿疾史氏實案黨之理宗猶未之
信也已而案薦周坦葉大有入臺與監察御史黃師雍不合語在黃師雍
傳言者多譽師雍而攻案案未正謝亟求去詔以舊職提舉臨安府洞霄

宮賜衣帶鞍馬未謝而賜蓋異恩也案既去監察御史陳求魯論之曰更化以來案排斥嵩之白簡猶在謂韓陰為嵩之地既非平論謂案其為嵩之謀案豈能保嵩之不念舊惡乎以疑似之心為揣摩之說案之不心服也固宜然案徧歷言路不問豺狼而問狐狸此羣言之所以不恕也案案嵩之黨皆給舍侍從臺諫都司求魯乃謂之狐狸蓋亦藉是以排案非為案伸雪也九年除資政殿學士等卒年六十有二贈通奉大夫後村大全集

案宋史黃師雍傳云案入政府謝方叔趙汝騰疏其姦案遂罷去牟子才傳云校書郎徐霖言諫議大夫鄭案臨安府尹趙與憲不報出關子才言陛下行霖言則霖留不行則不留也二人之中案尤無恥請先罷之案歷代名臣奏議子才此疏亦在案入政府之後劉克莊論案被謗事謂賢者又從而實之蓋指子才汝騰輩也案師雍皆正人而意見不能相合至於各袒所黨斯亦君子之過歟

徐明叔字伯仲一作晦晉江人紹定五年第進士辟江淮制幕秩滿幹辦廣福建列傳宋十二

士

福建通志總卷三四

漕清節益勵除太學錄泉州守真德秀延掌筦記明叔常作四規以獻德秀讀而歎曰吾當以此銘鑑几矣等通判漳州以廉聞知英德府盜寇不敢犯召為國子監丞潮寇起命知潮州設購捕渠魁戮之除直秘閣憲江右歲歉發義倉以賑郡民遷戶部侍郎改兵部侍郎會元兵南下憂憤卒明叔學有源委與洪天錫齊名人稱之曰擇齋先生八閩通志泉州府志

陳塏字子爽侯官人襄曾孫占籍嘉興端平二年登第案官至司農少卿以秘閣修撰知慶元府專力水利剏沙開保豐碑等淳祐三年知平江府兼淮浙發運使以戶部侍郎趙必愿舉最特轉一官遷大府卿終端明殿學士謚清毅塏為司農時嘗上疏請進恬退斥容悅以勵士大夫廉恥知太平州請蠲諸郡災傷又發公帑代三縣輸拆絲帛錢五十萬九千餘貫屢歷節軍民愛戴宋史道光舊志

案徐時棟烟巖樓文集有塏傳千餘言採書多種然專詳其修慶元水利事他多闕然

林希逸字肅翁號虜齋福清人曾祖昌言紹興進士端平二年登進士第
凡三試皆第四人初爲平海軍節度推官以清白稱淳祐中累遷國子監
學錄召試除秘書省正字遷校書郎入對乞信任給諫又乞早定大計以
慰人望理宗皆開納鄭清之再相屢薦希逸才學理宗諭令上封希逸恥
自鬻固辭清之以聞理宗曰觀此一節志趣可嘉也除兼莊文府教授逾
兩月遷樞密院編修官時史宅之同爲樞屬方以括田媒大用衆皆趣附
希逸獨面折不少屈遂以直秘閣出知興化軍先是陳藻之學出於林亦
之亦之出於林光朝希逸受業於藻藻無子希逸祀之家廟及官興化建
祠祀光朝亦之及藻號三先生祠并鐫其遺文以傳景定閒累遷司農少
卿直舍人院兼禮部郎官以年勞當遷秩乞將所得階貤贈亦之藻及故
友林公遇詔下其事議者以爲旌異遺逸朝家盛典也宜報可四馳之請
可勿聽希逸奏言弊例易啟直情難察他日源源而來者將以臣爲口實
乃如所請咸淳四年擢秘書少監明年除翰林權直遷太常少卿終中書
福建列傳宋十二

三

福建通志
總卷三四

舍人希逸以道學名一世而上賈似道敗極口稱譽至以趙普文彥博比
之頗爲士論所譏子泳字大淵寶祐元年進士歷安溪令通判興化軍國
子監丞

八閩通志道光舊志

吳叔告字君謀莆田人端平二年理宗親政策士叔告以發強密察爲說
擢第一僉書威武軍節度判官廳公事辟郡文學經指教者多所成就淮
西寇平府犒薄將士幾閱叔告白帥乞厚得無譁戍戍以正字召進校書
郎以薦兼史館校勘遷秘書郎輪對首言敵國外患天災地變乃動心忍
性側身修行之機今虜冰合未來遂談清野之效裸享偶霽動色格天之
祥大臣意向回隱朋黨植根百執事循默容身阿附權要督府毀撤藩籬
深處堂奧辟置多於朝列供億竭乎利源帥閫以鄰爲壑寇至閉壘自全
寇退邀功告捷此臣所深懼也又言邪封曲徑借曰御筆奏篇東閣報曰
旨依室垂鑒而襲承平之用度家四海而事舊邸之繕營次言流民和糴
二弊莫善于行方田之策莫不善于下清野之令庚子差考公試遷著作

佐郎兼權都官郎官以親老丐外知撫州其治以正風教扶善良爲先歲於綱運外和糴三十六萬斛降祠牒科配叔告稽簿書覈隱漏以佐糴溪運乏舟始造官舟募以資爲郎者代郡胥部押而言者反以爲罪丐祠不允尋除刑部郎初言路託某事不答江闕遣牙校督馬芻倨甚叔告不爲動閩大不平中外交構寢新命貶一秩自臨川歸母八十稱壽親友畢集叔告喜見顏色曰豈不勝於攢眉据案辦和糴督馬草時耶淳祐三年復元階主管崇禧觀六年差知袁州七年召奏事十年再除刑部郎主管崇道觀寶祐二年知漳州四年主管冲佑觀景定二年召除尚右郎官感泣曰今不扶老一行恐終不望清光入對言天下萬事其本在人主之一心無兩用臣嘗竊窺聖德每繼一大患難則動一大悔悟過一大變異則發一大儆懼真堯舜用心矣臣不知處安樂無事時和歲豐之時悔心懼心常如患難變異時否向者湖廣淮蜀四面皆敵今瀘城歸漣海復山東版圖再入職方矣向者霖潦饑饉民粒孔艱今土膏脉動農已下秧麥將新

福建列傳宋十二

三

福建通志
總卷三四

食矣行都之懋遷者輻湊輔郡之蕩析者漸復向之憂于敵儆於水者得無因是而少怠乎四凶得無量移乎書所謂巧言令色得無有孔壬者乎樂身之事得無有切於心者乎四月兼國史院編修官實錄院檢討官五月差殿試覆考官癸亥除大理少卿累疏丐外三月除直寶章閣提舉浙西常平事時鹽筴改隸他司或以爲病叔告曰上使吾舍孔彘筦權之利修耿壽昌常平之法某敢不奉詔有挾權貴求辟舉者謝以冗員不可增某人不可舉十一月召奏事再祈免得請喜甚南歸僕馬蕭然明年卒子起沃淳祐七年進士宣教郎起滬湖州判官

後村大全集
莆陽文獻

林彬之字元質福州人徙居莆田少有能賦聲與王邁方大琮齊名端平乙未真西山典舉以詞賦第二人擢第教授惠陽士論翕然再調福建常平司幹官時議權閩鹽上書帥漕力爭議爲寢甲辰謁選除書庫官遷武學諭出通判福州兼西外丞鄭清之當國以國子監主簿召九月爲明禮舉册官讀祝册音節清亮擢監察御史兼崇政殿說書因疏論天命人才

民心皆關國大體次言括田之害次言皇嗣當建又言彌遠用鄭損棄關中嵩之招北兵入城遂胎襄蜀之禍兩淮百姓逃死沙洲邊臣畏敵如虎運江浙米以餉兀坐之兵竭大農財以守不耕之野中虞減水困急之計人皆以爲至言已酉春又言雷雪大作積陰彌月必有召怨於民者備陳和糴征權括田之害四月朔日食又言扶陰抑陽三事畧云王曾張知白呂大防范純仁雖在朝而丁謂楊畏在外窺伺未已仲冬雷又言在易淳雷震長子王器之義資善雖建儲號未正理宗曰朕志已定辛亥九月將有事明堂有密薦嵩之者復以扶公論凝定力爲請理宗曰嵩之斷不復用王子除殿中侍御史仍侍講趙鼎與龔尹京以心計市寵無敢言者首疏攻之東裝俟命理宗使程元鳳諭之元鳳辭曰臣嘗與同臺知其必以死諍趙恃上眷無去意彬之以臺牒趣之理宗疑非舊典或陳袁韶尹京爲臺牒攻去故事乃出趙帥趙俄而余晦尹京以私意辱右庠之士彬之率同列奏罷之吳子明除大理丞謝暨除知嚴州彬之又言子明以恩澤補

福建列傳

宋十二

古

福建通志
總卷三四

右選換文守未考內除班列恥伍暨貴公子未更事豈可付以災傷之州理宗許寢二命令易奏以進執不可十月除權工部侍郎不就一再諭留同修撰國史實錄兼權左侍郎爲殿廬詳定官素與時相謝方叔議論不合余晦諭蜀謝所主也由是愈落落丐外以集撰知婺州徑歸五辭郡提舉太平興國宮乙卯除知甯國府又辭元鳳以書勉使出丙辰六月至郡蠲旱租減酒課折強宗幹僕領事五閱月不私支一錢一縑以御史吳衍疏罷踰年復職與祠景定中以先朝耆舊除寶章閣待制仍舊祠命未至而卒

竹溪唐齋十一藁續集後村大全集莆陽文獻名公事述

李丑父字良翁莆田人初名綱字汝礪改今名父宗之紹熙元年進士歷通判邵武軍有文名諸史百家口答疑問如流人目爲書厨晚歸授徒傳業席下常數百人丑父幼好學授室後獨寢夜誦達旦同郡劉克莊王邁方大琮皆大奇之年四十一始領鄉薦端平二年擢進士第調邵武軍司戶改通判福州移建寧府通判除太學博士兼沂王府教授初丁大全謀

躁進以丑父乃宰相鄭清之上客又與御史林彬之同里介丑父爲之游揚沈翥者大全黨也欲自結於丑父誦丑父闡策云願北面丑父語人曰吾豈願此曹稱佳翥及大全皆蓄憾及大全柄用令翥噤言者劾去之丑父曰吾師淵明矣買草堂西隙地卽亭山也因以自號開慶元年賈似道入相素重丑父薦於朝召爲太府寺丞累遷著作郎權禮部郎官班對首劄言郡壤於獻美邑壤於貪汙乾淳之際無貧州法司明而貪吏少今州之貧者什六七縣視州又加倍昔人云欲備契丹西夏當寬河北關中願陛下惜襄蜀淮漢廣西民力也瑣瑣臚仕先朝所無陛下於所厚者不容薄於至公者不容私穹班峻職名藩要郡咸畹雖皆得以才自見然議者但以爲恩澤侯挾貴臨民所至以貪暴稱大學一書深戒聚斂之臣力陳義利之辨願陛下以此授之皇太子以身教之第二劄論競侈之習大畧謂競心生則寡廉鮮恥侈心勝則踰禮越義請明法制移風俗自京邑始皆切中時弊除提舉湖南常平決殘婦久訟伸王媼八口被屠之冤劾全

福建列傳 宋十二

五

福建通志
總卷三四

邵兩守貪虐未報以風聞免官丑父笑指其足曰是閒有鬼吾歸休矣昇祠卒淳熙三年也丑父所得祿賜僅自給而銖積其餘爲義廩與宗族共之趙汝騰論之曰斯人純粹篤實君子也子濟孫景定三年第進士調壽州六安主簿勤孫安豐縣尉

後村大全集廬齋十一彙續集道光舊志

林存字以道閩縣人受業真德秀之門舉嘉熙二年詞科累官吏部侍郎中書舍人兼直學士院兼侍講時朝廷以參知政事蔡杭擅去國勉留不還詔除職予祠存繳進奏寢其命寶祐初知湖州五年秋明堂執綏備顧問稱旨除禮部尚書兼侍讀提綱史事累遷同知樞密院事兼參知政事後以資政殿學士六年罷知建寧府不赴遂提舉洞霄宮復起爲湖南安撫使知潭州

閩書吳興備志道南源委

常挺字方叔號東軒連江人唐觀察衮十八世孫嘉熙二年進士歷太學學錄淳祐中召試館職除秘書省正字升校書郎輪對乞以李若水配享欽宗改秘書郎寶祐二年遷著作郎出知衢州召爲監察御史兼崇政殿

說書疏言邊閫三事曰辟實才曰奏實功曰招實兵朝廷二事曰選良吏
曰擢正人復言願陛下深思宏遠之規模奮發清明之志氣立綱陳紀必
爲萬世法程昭德塞違以示百官憲度累除工部侍郎遷給事中時上用
北司董宋臣押班挺繳還詞頭連章三上弗聽而去未幾復起除寶章閣
直學士出知漳州改知泉州咸淳改元召權禮部尚書兼同修國史實錄
院同修撰進帝學發題擢吏部尚書三年除端明殿學士尋除通奉大夫
同知樞密院事封合沙郡公拜參知政事四年乞歸拜資政殿學士致仕
卒贈少保 宋史八閩通志

翁合字叔備崇安人七歲能文登嘉熙二年進士第歷官中書舍人國子
監祭酒出知贛州初合在兩制誥令典冊冠一時廬陵文天祥極推慕之
嘗貽合書云世無歐陽不當在弟子之列某知稽首矣由是合引爲知己
及出守天祥方退居文山合薦於朝起爲湖南提刑已而合除江西提刑
天祥丐便侍親移知贛州一遵合舊政民兩賢之景定中爲侍講德祐元
福建列傳宋十二

去

福建通志
總卷三四

年似道謫居建寧府合時已還朝上言似道以妬賢無比之林甫輒自託
於伊周以不學無術之霍光敢效尤於莽操其總權罔上賣國召兵專利
虐民滔天之罪陛下迫於衆怒僅謫建寧竊惟建寧實朱熹講道之闕里
雖三尺童子粗知向方聞似道名咸欲嘔惡唾去況可見其面乎乞將似
道遠竄荒裔以伸國法有旨責授似道高州團練副使循州安置未幾宋
亡合不知所終 閩書東越文苑道光舊志

案高斯得恥堂存稿書咸淳五年事云賈似道抗章請去宰執侍從臺
諫卿監以下皆拜疏請畱此漢廷羣臣頌莽功德之氣象也章鑑翁合
之徒無所忌憚如此夫合之劾似道不留餘地豈有留之之理且文山
集有與中書祭酒知贛州翁丹山書推挹甚至中云某退歸以來有泉
石十里足以爲適此必天祥卜宅文山後所貽天祥於咸淳六年兼學
士院權直忤似道意免官七年方居文山果合於五年有疏畱似道事
必爲天祥所鄙而書中無之恐斯得所載得之傳聞也合自號丹山有

丹山集

陳寢立名植以字行詔安人幼學於世父淳年十八以祖景肅廕補太學調龍溪令轉漳州司理登淳祐四年進士第以妻安定郡王女封郡馬都尉賜食邑提督嶺南海路兵馬帝昺浮海植領海舟見事急斷維出港自以六舟泊梅嶺收亡命馳檄諸蠻圖立宋後聞世傑舟覆元人索捕急變姓名隱大芹白華九侯間臨終遺命曰葬我必南望崖山弟格初爲海鹽主簿帝昺之亡也格從容賦詩從死植葬其袍笏於漸山書院後人並祀之閩書道南源委詔安縣志道光舊志

方蒙仲名澄孫以字行莆田人父大東

閩書作東叔

年五十一始登端平二年

進士乙科調永春主簿未赴道經建寧轉運使姚瑛聞其名檄攝甌寧縣尉兼府學教授畱數月以疾歸卒蒙仲登淳祐七年進士甲科廷對萬言始末欲聚君子以續國氣脈明公論以振國精神復請立涪陵後鍾秦檜子孫竄史嵩之以謝天下調邵武軍學教授賓禮者宿作成俊秀袁學庫福建列傳宋十二

七

福建通志綱卷三四

贏錢及教官例券置貢士莊秩滿監激賞所酒庫入爲國子監書庫官坐校交商論去取不能下氣罷添差通判南劍州改泉州郡守欽朝命攝守兼提點市舶籍胥魁素舞文者會趙葵宣撫江東西辟主管機宜文字擢國子監主簿葵移閩兩淮復辟爲參議官是時元兵渡江勢甚惡蒙仲通上下情捐循士卒葵每事必諮之元兵退遷知邵武軍擢節以繼之絕立樵川書院以廣教育帥司以治最聞尋召爲秘書郎未上而卒初賈似道開府淮揚英彥輻湊號小朝廷以幹官辟蒙仲持有羽書蒙仲磨盾鼻多萬字少千言似道以語妙天下薦之及似道人相舊賓客皆彈冠相慶蒙仲在邵武獨奏記言一生窮薄願爲朝廷撫摩凋瘵竟不至子公權字立道以父任補將仕郎善詞翰有父風登咸淳四年進士歷廣州教授太常主簿以歸景炎間興化再被兵者舊變衣冠求謁元帥唆都公權獨不仕人稱爲石巖先生後村大全集莆陽文獻東越文苑

呂中字時可晉江人淳祐七年進士歷沂靖惠王府諸王宮大小學教授